



Inatsisartut

*Aningaasaqarnermut Ataatsimiititaliaq
Finansudvalget*

Ulloq/Dato: 2. juli 2009
J.nr.: 01.31.06/09-00419

Aningaasanut Naalakkersuisoq

Aningaasaqarnermut Ataatsimiititaliap suliaq nr. 01.31.06/08-00419 pillugu sisamangornermi ulloq 2. juli 2009-mi aalajangiinera pillugu Naalakkersuisunut ilisimatitsineq

Nunarsuaq tamakkerlugu tuniluuttoqalerneru pissutigalugu nualluummut akiuussutissamik pisiniarnissamut ilassutitut akuersissuteqartoqarnissaanik qinnuteqaat (Suliaq nr. 01.31.06/09-00419)

Naalakkersuisut **inassutigaat**,

- kontomi pingaarnermi 32.11.05-imi, Nuna tamakkerlugu nakorsaaserisoqarfimmut tunngasumi aningaasaliissutit nualluummut akiuussutissamut atugassanik 2009-mi 2.500 t. kr.-inik amerlineqassasut.
- kontomi pingaarnermi 32.11.02-mi, Ineriartornermut Suliassanullu tunngasumi aningaasaliissutit malitsitut aningaasartuutitut atugassanik 2009-mi 500 t. kr.-inik amerlineqassasut.
- kontomi pingaarnermi 20.11.50-imi, Ingerlatsinerneq sillimmatitut tunngasumi aningaasaliissutit 2009-mi 3.000 t.kr. kr.-inik ikilineqassasut.

Aningaasaqarnermut Ataatsimiititaliap oqaaseqaatai

Nualluummut akiuussutissamik piniarnissamut 3 mio. kr.-inik ilassutitut aningaasaliissuteqarnissamik Naalakkersuisut suliami matumani qinnuteqarput. Nualluut A (H1N1) nunarsuaq tamakkerlugu tuniluuttuusutut WHO-mit nalunaarutigineqarsimasoq aammalu tamatuma kingunerisaanik akiuussutissanik 37.338-nik pisinissamut Kalaallit Nunaat isumaqatigiissutitigut pisussaaffeqartoq qinnuteqaammi allassimavoq. Ilaatigut akiuussutissamik pisineq ilaatigullu akiuussutissamik kapuinerneq pilersaarut aningaasaliissutinit qinnutigineqartunit matussuserneqassapput.

Aningaasaqarnermulli Ataatsimiititaliaq suliami aalajangiisinnagu apeqqutit kinguliiniittut akissuteqarfigneqarnissaat ataatsimiititaliamit kissaatigineqarpoq:

1. Aningaasaliissutinik amerlanerusunik pisariaqartitsineq Peqqinnissaqarfiup nammineq killissarisasa iluiannit matussuserneqarsinnaanngitsoq qinnuteqaammi allassimavoq. Taama naliliinerneq tunngavigineqartoq erseqqinnerusumik nassuiaavigineqassasoq kissaatigineqarpoq. Tassunga ilanngullugu ukiumi naatsorsuseriffiusumi 2009-mi Peqqinnissaqarfiup kontuini pingaarnerni ukiumoortumik atugassat siumut qanoq naatsorsorneqarsimanersut paasissutissiissutigineqassasoq kissaatigineqarpoq.
2. Danmarkimi nualluummut akiuussutissamik atuisartut akiliisinnerneqartarnerlutik aammalu atuisut akiliutaat atorlugit Kalaallit Nunaanni nualluummut akiuussutissamut aningaasartuutit ilaat matussuserneqarsinnaassappat?

3. GSK-mik isumaqatigiissutip nuutinnera kissaatigineqarpoq.
4. Suliassaqarfimmut 32-mut oqaasertaliussaq atuuttoq GSK-mik isumaqatigiissuteqarnissamut tunngavigissallugu naammattutut isigineqarsimanersoq paasissutissiissutigeqquneqarpoq. Taamaassimappat 2010-mi aningaasanut inatsisissatut siunnersuummi oqaasertaliussamik nutaamik Naalakkersuisut sooq kissaateqarnersut paaserusunneqarpoq. Taamaattoqanngippat isumaqatigiissutigineqarsimasoq pillugu paasissutissat erseqqinnerusut kissaatigineqarput.
5. Nualluummut A-mut (H1N1) akiuussutissamut, tamatumaluunniit kingunerisaanik allaffissornermut 2010-mi aningaasartuuteqarnissaq naatsorsuutigineqarpa?
6. Suliami pingaaruteqarsinnaasunik allanik Naalakkersuisut paasissutissaateqarpat?

Aningaasaqarnermut Ataatsimiititaliap aalajangiinera

Paasissutissanik allanik utaqqimaarnissaq siunertaralugu Naalakkersuisut inassuteqaataannut isummernissani Aningaasaqarnermut Ataatsimiititaliap **kinguartippaa**, tak. siuliani allassimasut. Naalakkersuisut akissuteqaataat kalaallisut danskisullu nassiuteqquneqarpoq aammalu elektroniskiusumik uunga nassiuteqquneqarluni nch@gh.ghl. Aningaasaqarnermut Ataatsimiititaliaq aatsaat ulloq 5. august 2009-mi tullianik ataatsimiissaaq, Naalakkersuisulli akissuteqaataat naammaginartutut isigineqassappat piffissami sulinngiffeqarnerup nalaani qinnuteqaammik akuersinissamut siulittaasoq ataatsimiititaliamit piginnaatinneqarpoq.

Aningaasaqarnermut Ataatsimiititaliaq sinnerlugu

Akitsinnguaq Olsen
Aningaasaqarnermut Ataatsimiititaliami siulittaasoq